

PIO XII - JUAN XXIII

Urriko illak bi berri aundi jalki zituan Erromatik mundu zabale-
ra. Lenengoa: Aita Santua il da. Bigarrena: Ba-degu Aita Santu
berria.

Urriko 9'an, goizeko 3'ak eta 52 minututan il zan XII Pio, Aita
Santua.

Urriko 28'an, arratsaldeko 5'ak eta laurdenak-inguruan izendatu
zuten Aita Santu Aingeru Roncalli, Veneziako Patriarka zana.

* * *

Aita Santuaren il-berriarekin batera zabaldu zan mundu osoan
naigaberik biziena ere. Katolikoak zer esanik ez; baño beste erligioe-
tako jendeak eta fede-gabeak ere, agertu dute beren biotzetako naigabe
aundia; bai aitortu ere munduan izan dan gizonik aundienetakoa zala
Aita Santu zana.

Esan dezagun lenenik bere gorazarrerik aundienerako izango dana:
Santu aundi bat zala, alegia. Otoitz eta lan: ori zan bere bizitza guztia.
Eta Elizaren gobernurako egiten zuan lana bera ere, otoitza zan
Pio XII'garrenarentzat. Otoitzean ikustea zan naikoa, aren biotzeko
garra somatzeko; bai erretratoan ikustea ere!

Eta Jaungoikoak ez ote zuan saritu Aita Santuaren santutasun ori,
izan zituan mirarizko agerketa ta orrelakoen bidez? Bai noski.

Jesukristoren ordeako zan lurrean; eta...Aren antzeko ere bai.
On egin; ondo egitea zan bere biotz aundiak eskatzen ziona. Ezbea-
rretan, premietan, atsekabeetan, al ba'zuan, lagundu; ori eziñean, ezti-
rik gozoena ixuri biotz mindunetan.

Eta jakintsu ta langille. Jakintsu izan bearko, sail guztietako gi-
zonik jakintsuenai, bakoitzari zegokion gaiean, itz egiteko. Eta itz
egin ere, nola itzegin gañera! Gai guztietan jakintsu agertu zan mun-

duko jakintsurik aundiaren aurrean. Itzez eta idatziz eman zituan al-
dian aldiko erakutsiak eman al izateko, langille izan bear, nai ta
naiez. Egunez lan eta gauaz ere bai; goizaldera itzaltzen omen zan
gauero-gauero, bere langelako argia. 33 santu berri erantsi zizkion
santuen izendegiari ta 52 Zoriondun berri.

Aita Santu on eta agurgarri izan zan eta santu aundi; ala ere, bere
gogoa aintzat artuaz, dagiogun otoitz Jaungoikoari bere alde.

* * *

Erromatik urrillaren 9'an zabaldu zan il-berriak min eman zion
kristau-erriari; il bereko 28'an zabaldu zanak, aldiz, poz aundia:
"Ba-degu Aita santua".

Nor da bera? Veneziako Patriarka zan Aingeru Roncalli jaun
agurgarria. 1881 urteko azaroaren 25'an jaio zan, Italiako *Sotto il
Monte* errixkan. Gurasoak eta senideak, amarretaraño ba omen ziran,
nekazari beartsuak. 1904 urtean apaiz zan; 1925'garrenean Obispo;
1953'garrenean Kardinale, eta 1958'garrenean Aita Santu. Aita Santu
berria izendatzeko batzarra asi ta andik irugarren egunean, amaika-
garren boto-aldian, gertatu zan aukeratua Aingeru Roncalli jauna. Bai
laxter jakin ere mundu zabalean Aita Santu berria ba-genuala ta nor
zan. Gizon atsegiña da, biotz aundikoa, argia ta jakintsua. Apaiz
egin-da bereala, Bergamoko Obispo jaunaren sekretayo egin zuten;
1914'ko gerratean, gudarien apaiz ibilli zan; gero Italia osorako Sinis-
men-Zabalkuntzaren zuzendari izendatu zuten; Pontificium Semina-
rium Lateranense, apaizgaietxeko erakusle ere izan zan; 1925 urtean
Obispo egin-da gero, Bulgariara joan zan Aita Santuaren ordeko, ta
diplomatiko bizkor agertu zan; andik, 9 urte ondoren, Turkian eta
Grezian igaro zituan beste 10 urte, Aita Santuaren ordeko, an aietan
ere; 1944 urtean Parisera bial zuan XII Pio Aita Santuak, bere orde-
ko nuntziotzara; eta azkenik, 1953 urtean Kardinal egin, eta Vene-
ziako Patriarkatzara jaso. Andik etorri zan Erromara, geiago ara ez
biurtzeko, noski. An, Kardinal Patriarka bezela sarrera egin zuanean,
auek esan omen zituan lenen-itzak: "Guraso beartsuen umea naiz..."
Orduan bezin umil eta jator jarraitzen omen du orain ere.

1954 urtean Santiago de Compostelara erromes joan zanean, Eus-
kalerrian gelditu zan eta Pasai San Juanen igaro zituan egun bat edo
beste. Ba-daki euskaldunen berri eta maite ere, maite omen gaitu.

Jaungoikoak urte on askotarako gorde dezaigula. Otoitz bere alde!

XI-1958

ZUGASTI